

元豐類藁

冊五

元豐集

南豐先生元豐類藁卷第二十一

制誥

左僕射門下侍郎王珪追封三代并制

曾祖永贈開府儀同三司

勅禮取其稱故位益尊則事其先者世益遠今予
良弼褒命其親得上至于三世求之於禮豈非取
其稱哉具官某曾祖某仁篤慈祥畜德甚盛蓋其
爲積也厚則其流澤也廣故能開相厥裔爲時宗
臣百辟是師王室是輔推功原大肇基自爾顯揚
崇寵茲惟舊章是用進爾之階秩在第一尚其不
昧服此茂恩可

曾祖母尹氏追封燕國太夫人

勅優禮大臣厚其寵數所以勸在位之功德而共

成天下之治也宰相之任重矣尊榮光大上施于其三世豈不卽乎人情而稱其位序哉具官某曾祖母某氏幽閑靜專躬蹈純德嬪于盛族壺彝是稱啓佑後人任國幾政流澤所自宜極褒崇追命定封列于大國光靈不泯尙服朕恩可

祖贊追封魏國公

勅夫下之忠乎上教有所自故上之仁乎下恩有所延其體相成治道所出惟吾股肱之佐共任天下之重愍書寵秩施其祖廟所以慰其顯親之心稱其事君之義具官某明允純篤德業惟茂義訓不倦彌遠益彰維時聞孫實輔予治念功原始宜極褒嘉庸建爾于上公俾受國于全魏歿而尙有知也其服朕之厚恩可

祖母丘氏追封魏國太夫人

勅夫其先之畜德也厚則其裔之蒙澤也長故寵祿在其子孫則褒榮施其祖禰獎功錄善必揆所繇所以勸天下之成其家也具官某祖母某氏身蹈純行嬪于令人教行閨門自隱而顯惟予哲輔實爾慈孫質厥所原宜有加命嘉一作全魏大國從夫之尊服此寵章尚綏爾後可

父準追封漢國公

勅朕敷求哲人以共大政隆名寵祿既俾集于厥躬褒大推崇則又施其禰廟所以遂吾大臣欲顯其親之志而開示在位予一人尊獎近輔之心具官某父某材通世用行蹈天常德畜不施澤流及遠惟時有子爲國宗臣參聽萬機人望惟允慶所

自出朕惟汝嘉屏蔽四方漢爲最大受茲封土承
裕爾家可

母薛氏追封漢國太夫人

勅位有貴賤升降之等故禮有隆殺損益之差今
輔予聽斷萬機之臣在師長百官之任蓋列於廊
廟名秩旣殊故追榮其親命數亦異茲惟故事其
可易哉具官某母某氏婦道以順母儀以慈言爲
壺彝動應圖法能教其子爲時宗工股肱朕躬王
室是賴褒崇之典旣啓名城漢惟大邦改進封號
尙宜寵渥永祚厥家可

妻鄭氏追封楚國夫人

勅詩人之義君之夫人有委蛇之行河山之德然
後在尊位備盛服從其夫榮可以爲稱施於世教

所以始人倫而出治道也具官某妻某氏淑茂柔明生于令族動靜以禮協于經言相予宗臣慎其內行曾不偕老永綏厥家湯沐之田旣受方國有加追寵宜易新封尙其光靈服我休命可

中大夫尙書左丞蒲宗孟追封三代并進封妻制

曾祖穎士贈太子少保

勅朕稽于古以正百官惟尙書政本而左轄綱紀之司延登哲人俾祇厥敘愍有加寵逮其重祖所以隆崇大臣國之典也具官某曾祖某潛德西南在約彌勵流光錫祚集其後昆總典中臺實輔予治東朝二品是用命爾尙維幽漠服此茂恩可

曾祖母鮮于氏追封大寧郡太夫人

勅宗廟之數諸侯以五蓋任彌重者禮彌盛貴賤之節然也今吾大臣追命及其三世與夫朝制豈異意哉具官某曾祖母某氏作德於內以宜厥家啓相後人預蔽國論按圖考地俾定爾封其尙有知服茲寵號可

祖伸贈太子少傅

勅人本乎祖故吾加恩近輔褒榮其先至于累世豈不緣人之情而制爲命數哉具官某祖某內含純明外蹈規矩流澤也遠有孫而賢進于中臺摠國綱轄善有所自朕惟汝嘉東朝之孤傳位爲寵用賁幽宅尙其欽承可

祖母陳氏追封蜀郡太夫人

勅世德之積者久則發於其後者長故朕隆崇近

輔而褒榮其先非一二世而止所以勸天下之善
豈非博哉具官某祖母某氏淑慎恭儉化行閨門
啓其元孫持國綱要蜀惟爾土以定新封尙其如
存膺此茂渥可

繼祖母朱氏封閬中郡太夫人

勅夫位以德升禮以位敘不失其稱茲爲義榮今
吾崇進大臣而圖其先烈內外命秩亦惟其宜所
以使上下之間公論惟允具官某繼祖母某氏婉
嫕冲靜行孚于家祚爾之孫興以輔朕西南上郡
愍有褒封垂聲贊書尙其不殁可

父師道贈太子少師

勅吾之大臣繇聰明材諳以有爵祿之榮予有命
書愍贈賁其考廟所以稱其顯親之心慰其霜露

之感位不次授厥惟故常具官某父某忠篤純明德履惟茂壯謀循政聲列在人積厚慶隆及子而顯時予左轄司國紀綱惟流有原開跡自爾宮師之貳名寵秩尊以告幽局尙其祗服可

母陳氏追封潁川郡太夫人

勅人子之於其父母莫不有顯揚褒大之心惟任重秩尊得盡其志此隆名寵祿所以勸天下也具官某母某氏經德履善宜其家室錫羨流祉在爾後人時予宗工任國綱轄陪京望郡俾定新封服我命書尙其不泯可

妻陳氏封河東郡夫人

勅朕援用天下之材以爲共政之臣就位之初恩數禮秩所以尊榮光大之者上施其祖禰而旁及

於閨門蓋任屬之者重則褒隆之者其可以不異哉具官某妻某氏言容功德柔閑懿恭嬪于令人休有華問惟時哲輔進秉國成相助之勤爾効彌顯改擇加郡登崇號名尚宜厥家永綏寵祿可

陸佃兼侍講蔡卞兼崇政殿說書制

勅朕於書無所不學於天下之事無所不攷而不敢自以爲足故設置講解之官使以先王之六藝日陳于前朕於求多聞以建事之心可謂勤矣具官某好古知經宜在此位夫尊其所聞以懋厥職茲爲爾守其尚起哉可

蔡卞改講解作誦說

徐禧給事中制

勅有殿內之臣職在於平奏述詳命令糾其違者而止之覆其是者而行之至於決獄官人條陳法

式之事莫不當攷察焉其任可謂重矣具官某以財進拔典執邦憲茲用推擇俾踐厥位惟精敏不懈可以周閱讀惟忠實不撓可以司論駁朕方觀爾之效爾尚慎於厥脩可

鍾浚將作少監制

勅具官某繕脩興造程工督作之任不可不屬之其人位視九卿禮秩甚寵正名之始考擇惟慎爾以材選往貳厥官尚其祇承以允收拔可

蔡燁河東運判制

勅具官某分部而使雖以將漕爲名然實在於摠庶務之予奪察羣吏之能否參予任屬選授其艱以爾爲能俾承厥序夫均通貨食使物有羨贏審覈幽明使人知勸畏茲爲爾守其往懋哉可

供備庫副使董琰等十一人轉官制

勅具官某等西南之蠻恃阻且遠跳踉溪谷負誼干誅王師鼓行舉其巢穴斬獲摧陷爾預奏功第賞有差尚惟祗服可

待制王堯臣知單州制

勅提將之符顓制一道使紀律明於士衆忠實紀於朝廷然後爲國藩垣能稱其位具官某統治晉陽宜知其任而西伐之卒比有逋亡繼形奏陳皆以疾苦無直繩肅下之誼有浮言罔上之迹雖付之刺督考驗甚明而旣更詔恩法當貸爾俾仍近職往守偏州尚自省循茲爲薄責可

鄧忠臣母周氏封縣太君制

勅具官某母某氏爾子忠臣有勞應賞願更寵典

以啓爾封俾錫命書茲爲異數尙惟祇服以稱茂恩可

杜常兵部郎中制

勅具官某朕爲保伍之法寓戰陣之教欲使兵與農合庶幾先王之迹夏官之屬實參典領以材擢爾往祇厥序夫能獎誘服田之人悅趨講武之政馴致有漸而彌綸不疏惟無廢爾之勤可以承朕之志可

李士京韓宗文大理寺主簿制

勅具官李士京等察治犴獄之官勾稽簿領之事往祇選用無懈厥修可

許懋兩浙運副制

勅具官某朕擇遣使者分部而治雖以將漕爲稱

然實總民政之舉措察吏屬之能否蓋連數十城之地舉而屬之其選豈不重哉爾詳練敏明宜服予采蓋爾之職非止於督賦斂斷獄訟而已惟除苛熄擾可以使民遂其宜惟務實去華可以使吏馴其行宣恩德而美風俗待爾能善其官可不勉歟以祇朕命可

內殿承制段綽等知州制

勅具官某州有兵民之寄而地在疆場之間則常擇用材武之臣屬之守禦之任爾以能選往祇厥服尚思綏靖以稱簡求可

宗室承操新婦王氏進封國夫人制

勅親愛之而欲其貴富朕於公族皆推是心寵數徽章施於閨壺茲惟故事朕敢忘哉具官某新婦

某氏作合宗藩躬有馴德啓茲全國用進爾封以致朕尊獎近屬之恩尙懋爾服承休顯之稱可

宗室克懼復官制

勅具官某屬在近親享有榮祿以愆坐法亦旣再期稽于故常宜服位等勉思祇飭稱此茂恩可

李德明遙郡團練使制

勅具官某擐甲執兵人之重任賞信而速所以勸功爾忠力武材稱于種落往殲醜類屢以捷聞圖爾之勞進位二等益思奮勵以待異恩可

陳景等尙書省主事令史

勅某中臺政本主曹事治文書亦不可不屬之其人爾往懋哉皆仍舊秩可

折克行彭保轉官制

勅具官某朕惟羌之猖狂內相賊虐致天之罰爰命六師開通道塗收復城聚摧堅獲醜爾功居多蓋夫軍賞之行速則衆勸是用進爾之秩以激士心尙有不次之恩以待非常之効可

程嗣恭祖無頗程博文開封府推官制

勅具官某開封天下之聚俗雜五方之民蓋巧僞繁興獄訟滋出贊治之任攷擇維艱以爾爲能俾祇厥服夫慈惠足以煦養惇弱剛嚴足以帖伏奸強然導民之方尙有可識使風俗有以粹美而四方有以觀則往助爾長其尙懋哉可

李憲武勝軍節度觀察留後制

勅王師西出士大夫皆奮力行陣有尺寸之功者朕無不錄况議勞數實有大於此者其於信賞朕